

嘉慶新修江寧府志

新修江寧府志卷之二十五

名宦一

江寧古丹陽郡地自移治建業以來歷東晉六朝南宋以迄前明屢爲都會守斯土者簿領尤繁自守令至丞倅治績炳著者代不乏人德澤在當時崇祀及後世尙已卽祀事未及而甘棠繫思邱麻誌頌均應表章以勸來者今采輯各史并南畿諸志參以去思公論編錄於篇作名宦志

漢李忠字仲都東萊黃縣人建武六年爲丹楊太守是時海內新定海濱江淮多擁兵據土忠到郡招懷降附

旬月皆平忠以丹楊越俗不好學嫁娶禮儀衰於中國
乃爲起學校習禮容春秋鄉飲選用明經郡中向慕之
墾田增多三歲流民占著者五萬餘口三公奏課爲天
下第一後漢書有傳

晉溫嶠字太真祁縣人丹楊尹晉書有傳

褚裒字謀遠陽翟人蘇峻之亂京邑焚蕩人物凋殘乃
以翼爲丹楊尹翼收集散亾甚有惠政晉書有傳

劉惔字真長相縣人永和中外丹楊尹爲政清整門無雜
賓時百姓頗有訟官長者惔歎曰居下訕上此弊道也
古之善政司契而已君雖不君下安可以失禮若此風

不革百姓將往而不反悉寢不問疾篤百姓爲之所禱
晉書有傳

庾龢字道季鄱陵人亮之子升平中代孔嚴爲丹楊尹
表除重役六十餘事民賴之晉書有傳

羊曼字祖延南城人少知名蘇峻作亂加前將軍丹楊
尹率文武守雲龍門王師不振或勸曼避峻曼曰朝廷
破敗吾安所求生勒衆不動爲峻所害晉書有傳

朱劉穆之字道和莒縣人領棠邑太守義熙八年加丹
楊尹南史有傳

謝方明陽夏人宋永初中尹丹陽善治郡有能名南史

有傳

蕭摹之南蘭陵人宋元嘉時爲丹楊尹上言佛入中國已歷四代形像塔寺所在千數材竹銅綵糜損無極無關神祇有累人事請自今欲鑄銅像及造塔寺皆得列言須報乃得爲之文帝從其請南史有傳

何尚之字彥德瀟人宋元嘉中爲丹陽尹立宅南郭外置學聚生徒東海徐秀等並慕道來遊謂之南學南史有傳

羊元保泰山南城人宋元嘉中歷任丹楊丞轉尹廉靜寡欲頻授名郡爲政雖無殊績而去後常必見思南史

有傳

劉秀之字道寶莒人宋元嘉中兩任建康令政績有聲
大明二年遷丹楊尹時宮禁市百姓物不時給值秀之
以爲非宜陳之甚切南史有傳

袁粲初名愍孫陳郡陽夏人宋明帝時領丹楊尹南史
有傳

齊劉懷慰字彥泰平原人齊高帝時以懷慰爲齊郡太
守至郡修治城郭安集居民墾廢田二百頃決沈湖灌
溉不受禮謁民有餉新米一斛者懷慰出所食麥飯示
之曰食有餘幸不煩此因著廉吏論以達其意南史有

傳

梁王志天監初爲丹楊尹政務清靜有寡婦無子姑亾舉債以殮葬旣而無以還之志愍其意以俸錢償焉年饑每旦爲粥於郡門以給百姓衆悉稱惠南史有傳

王仲臨沂人丹楊尹習於法令政號平理南史有傳

杜稜字雄盛錢塘人丹楊尹南史有傳

陳袁樞字踐言陳郡陽夏人天嘉中領丹楊尹謹慎周密清白自居文武職司鮮有游其門者南史有傳

徐陵鄒縣人仕陳爲安右將軍丹楊尹性清簡祿俸與親族其之家至乏絕南史有傳

唐盧祖尚光宗樂安人武德中歷蒲州刺史有能名唐書有傳

顏真卿字清臣琅邪臨沂人肅宗時拜昇州刺史清嚴正直風采凜然人不敢干以私唐書有傳

按顏魯公平生屢至江寧然皆爲時不久至德元年去平原太守至廣陵丹陽等郡募兵不得此一至也乾元二年由饒州刺史六月遷昇州刺史充浙西節度使是再至也次年爲上元元年以預飭戰備待劉展李岷以爲生事非短之召爲刑部侍郎及代宗大歷六年自撫州秩滿代到至上元居與蔡明遠敘所云緣事受替歸

止金陵也七年入都除湖州刺史是三至也合計居此
日月不及三年

宋楊克讓字慶孫同州馮翊人開寶八年平江南命知
昇州每視事自旦至暮決斷如流無有凝滯當官以清
幹稱宋史有傳

賈黃中滄州南皮人太平興國二年知昇州爲政簡易
部內甚治一日案行府署見一室扃鑰甚固啟視之得
金寶數十匱直數百萬乃李氏宮闈中遺物也卽表上
之太宗謂侍臣曰非黃中廉恪則亾國之寶將枉法
害人矣賜錢三十萬宋史有傳

馬亮字叔明合肥人景德初自潭州徙知昇州屬歲旱民饑湖湘漕米數十舟適至亮移文守將發以賑民因奏瀕江諸郡皆大歉而吏不知救願罷官糴令民轉粟相賑凡四守是郡敏於政事務求民瘼宋史有傳

張詠字復之濮州鄆城人有治才真宗朝以禮部侍郎知昇州剛方自任爲治尙嚴宋史有傳

薛映字景陽蜀人以樞密直學士知昇州建言州以牛賦民出租牛死租不得蠲真宗矍然曰朝廷豈知此邪因令諸州條奏悉蠲之宋史有傳

丁謂天禧中知昇州言城北有後湖疏爲城陂以蓄水

使負郭無旱歲廣植蒲芡養魚鼈縱貧民漁採從之宋史有傳

薛顏字彥回河中萬泉人知江寧府邏者晝劫人反執平人以告顏視其色動曰若真盜也械之果引伏宋史有傳

王隨字子正河南人天聖初知江寧府歲大饑轉運使移府發常平倉米計口日給隨不聽曰民饑由兼并閉糴以邀高價耳乃大出官粟私價遂平宋史有傳

李若谷字子淵徐州豐人知江寧府卒挽舟過境其輿瘠甚者畱養視之須春溫遣去民勺於道者以分隸諸

僧寺助給春爨其治民多智慮愷悌愛人去後益見思
宋史有傳

張奎字仲野臨濮人慶歷八年江寧府治火諫官言金
陵始封之地守臣視火不謹宜擇才臣繕治之遷右諫
議大夫知府事簡材料工一循舊制不踰時復完奎風
力精強所至有治績吏不敢欺宋史有傳

張方平字安道南京人皇祐初知江寧府當官亮直未
嘗以言徇物以色假人宋史有傳

李岩字仲嚴青州人知江寧府民有告人殺其子者曰
吾子去家時巾若巾今巾是矣人自誣服宥疑召問卒

申其枉宋史有傳

劉湜字子正彭城人皇祐四年江寧饑擢知府事奏運蘇州米五十萬斛以貸饑民宋史有傳

包拯字希仁合肥人嘉祐初知江寧府性峭直惡吏苛刻務敦厚雖甚嫉惡而未嘗不推以忠恕宋史有傳

王琪字君玉成都華陽人嘉祐間知江寧府先是府多火災或託以鬼神人不敢救琪召令廂邏具爲作賞捕法未幾得姦人誅之火患遂息宋史有傳

梅摯字公儀成都新繁人初令上元嘉祐三年知江寧府性淳靜不爲矯厲之行政迹如其爲人宋史有傳

馮京字當世鄂州江夏人嘉祐五年知江寧府事至卽據案推究不以付獄一無壅滯人服其敏宋史有傳

呂溱字濟叔揚州人治平閒知江寧府精識過人辯訟立斷豪右斂跡一時名輩皆推許云宋史有傳

傅堯俞字欽之須城人熙寧中知諫院遇事輒言五年改知江寧人以爲法令未安者必多更改堯俞到郡一遵條約曰君子素其位而行諫官有言責郡知守法而已司馬光以清直勇稱之宋史有傳

陸佃字農師山陰人元祐七年知江寧府人有盜嫂害其兄者別誣三人同謀皆抵罪一囚父稱冤通判以下

皆曰獄已成不可變佃爲閔實三人皆得生宋史有傳
會肇字子開南豐人元祐間知江寧府天資仁厚多善
政宋史有傳

蔣靜字叔明常州宜興人崇寧五年知江寧府抗直不
畏強禦茅山道士劉混康以技進賜號先生其徒倚爲
姦利詞訟至府吏觀望不敢治靜悉抵於法宋史有傳
沈錫字子昭真州揚子人大觀三年以徽猷閣待制知
江寧府張懷素誅朝廷疑其黨有脫者由是怨家多誣
告郡獄爲滿錫至案其妄者罪之具疏於朝他郡繫者
皆得釋宋史有傳

李彌遜字似之蘇州吳人靖康二年建康府牙校周德
叛勢猖獗彌遜以江東運判領郡事單騎扣賊圍諭以
禍福勉使勤王誅首惡五十人撫其餘黨一郡帖然宋
史有傳

呂頤浩字元直齊州人以江東安撫制置使兼知建康
府事當國步艱難人倚之爲重宋史有傳

權邦彥建炎中知建康府劇盜張琪殘虐徽州邦彥遣
裨將討平之爲政以治辦稱宋史有傳

葉夢得字少蘊吳縣人紹興初爲江東安撫大使兼知
建康府時建康荒殘兵不滿三千夢得奏防江措畫八

事咸合機宜宋史有傳

趙鼎字元鎮解州聞喜人紹興二年知建康府軍民相安商旅通行高宗常謂王庶曰鼎鎮撫建康回鑾無患他人所不及也宋史有傳

張燾字子公德興人知建康府建康積歲負內庫錢帛鉅萬悉爲奏免致仕復知建康金人窺江南民驚徙過半聞燾至人情稍安宋史有傳

張浚字德遠漢州綿竹人紹興三十一年春金騎充斥命浚判建康府兼行宮畱守高宗臨幸浚迎拜道左風采隱然軍民皆倚以爲重高宗將還臨安勞浚曰卿在

此朕無北顧憂矣宋史有傳

陳俊卿字應求興化人孝宗朝充江淮宣府判官兼權建康府事政寬簡郡多無名之賦爲一一奏罷之宋史有傳

洪遵字景嚴鄱陽人乾道七年以端明殿學士權知建康府甌民苗米正額外不輸耗聽民自持斛槩庾人不能輕重其手民咸感之宋史有傳

李植泗州臨淮人乾道初知建康府兼本路安撫使上書極言防江十策皆直指事宜不涉浮泛孝宗奇之宋史有傳

劉琪字共父崇安人淳熙二年知建康府會歲屨首奏
蠲夏稅糧六十萬緡秋苗米十六萬六千斛又運米卹
落平價賑糶起是年九月盡明年四月闔境數十萬人
無一捐瘠流徙者宋史有傳

張杓綿竹人累知建康府吏材敏給遇事不凝滯多隨
宜變通以治稱宋史有傳

徐誼温州人知建康府兼江淮制置使時金人攻廬楚
不下淮人流江南北在建康者以數十萬計誼晝夜撫循
悉力備禦地方賴之宋史有傳

葉適字正則温州永嘉人開禧間知建康府時金人大

入羽檄劬午適治事如平時軍需皆從官給民以不擾
宋史有傳

黃度字文叔紹興新昌人嘉定初知建康府兼江淮制
置使至金陵罷科糴輸送之擾活饑民百萬口除見稅
二十餘萬擊降盜卞整斬盜胡海首以獻招歸業者九
萬家宋史有傳

趙善湘字清臣濮王五世孫寶慶初以沿海制置使兼
知建康府勦防江軍臨淮軍及平叛寇皆有功宋史有
傳

吳淵字道甫江東安撫使兼知建康府興利除害究心

軍民列上二十五事詔下奇之弟潛繼知建康府論保蜀之方護襄之策防江之算備海之宜甚有條理宋史有傳

董槐定遠人淳祐間知建康府時軍政弛弗治乃爲賞三等以教射歲餘盡爲精兵宋史有傳

馬光祖字華父婺州金華人寶祐三年以寶章閣直學士知建康府凡三至建康終始一紀威惠並行百廢修舉宋史有傳

姚希得字逢原潼川人開慶中知建康府按行江上慰勞士卒衆皆歡說溧陽饑發廩賑濟全活者衆初寧江

軍列砦置屋二萬餘間屯戍七千餘人理宗間之降詔
獎諭宋史有傳

胡旦字周父濱州渤海人爲昇州通判時江南初平汰
李氏時所度僧十減六七旦曰彼無田廬可歸將聚而
爲盜悉黥爲兵遷左拾遺宋史有傳

蘇易簡太平興國中通判昇州清約如寒素太宗召爲
知制誥曰聞卿舟惟載怪石痛木器可見清節宋史有
傳

呂蒙正字聖功河南人太平興國二年通判昇州陛辭
有旨民事不便者許騎置以聞宋史有傳

段少連字希逸開封人天聖中張士邁守江寧辟通判
府事通敏有才事無大小決遣如流不爲權勢所屈宋
史有傳

滕宗諒字子京河南人通判江寧府尙氣節倜儻自任
家無餘財所蒞州喜建學學者傾江淮間宋史有傳

沈遘字文通錢塘人通判江寧府遘以文學致身而長
於治才歸奏本治論仁宗曰近獻文者率以詩賦豈若
此十篇之書爲可用也除集賢校理宋史有傳

楊邦乂字晞稷吉州吉水人舉政和中進士值時多艱
每言及國事詞旨慨慷以節義自許調建康府教授復

以勞授通判建康府事建炎三年金人至江上不屈死
宋史有傳

元絳字厚之錢塘人明道初調江寧府推官時江淮旱
災官發廩米爲糜以哺流民絳躬自給視饑病者數萬
皆得以濟攝上元令民有號王豹子者豪占人田略男
女爲僕妾有欲告者則殺以滅口絳捕寘於法有妻告
夫爲人所殺訊之實不殺絳敕其妻曰歸治而夫喪陰
使信謹吏跡其後望一僧迎笑切切私語絳命取僧繫
廡下詰妻姦狀卽吐實人問其故絳曰吾見妻哭不哀
且與傷者共席而孺無血汚是以知之安撫使范仲淹

表其材宋史有傳

楊告綿竹人通判江寧州盜殺商人鑿舟沈屍江中有
被誣告者笞服獄具告疑其無狀後數日果得真盜
李及字幼幾范陽人調昇州觀察推官資質清介所治
簡嚴喜慰薦下吏而樂道人之善宋史有傳

元岳天禎冠氏人大德十年爲建康路總管值歲饑官
廩中無儲粟乃諭富戶出鈔二萬錠賑濟饑民賴以全
活者甚衆時米價騰湧牙僧翦緣爲姦天禎杖其尤桀
黠者召商旅飲之酒以義諭之估值乃平郡中立碑紀
遺愛至大二年卒於官

明楊元杲潯人洪武初扈蹕渡江以行省員外郎歷應天府尹練達政體智慮周密爲太祖所稱明史有傳鄭沂不知何許人明初爲監察御史洪武三年沂上言京師爲天下根本四方之所瞻仰爵位之設當使內尊而外卑內重而外輕所以隆國勢而安天下也今南京知府與在外知府同甚失內外之統宜改爲京尹則國體尊而爵位重矣上從之四年遂以沂爲府尹六年致仕

顧佐字禮卿太康人永樂中以江西按察副使召爲應天府尹剛直不撓吏民畏服時方之包孝肅明史有傳

薛均湖廣蘄水人永樂中授應天府尹廉明持正買地種蔬旦暮荷鋤往耘日飽菜茹文皇密使人廉之得其狀笑曰人皆行樂惟朕與均苦耳

鄭埜字孟質宜章人宣德十年以陝西副使陞應天府尹獨苛急政市征田稅皆酌其平明史有傳

魯崇志字懋功天台人成化十年任應天府尹先是七邑民阻饑逋賦數萬石崇志勸貸以輸而賑其貧者溲水有姦民武斷於鄉爲人所患有司莫敢誰何崇志擒治之中貴人王敬怙勢以鹽二萬引懇竊規重利崇志厲色拒之愷弟詳雅一介不苟取予怨有不讎而德無

不報尤加意青衿今儒學櫺星三門猶其創建云
于冕字景瞻錢塘人忠肅公謙之子歷任應天府尹好
學崇禮興利鋤弊一以仁愛爲心雖罹家難而聲問不
墮人皆稱之明史有傳

樊瑩常山人宏治五年爲應天府尹時百姓殷富民知
自愛鮮犯法瑩亦坦直不立威嚴與民言若家人民懷
之

吳雄仁和人宏治十四年爲應天府尹風局嚴整以肅
清爲任時大瑞守畱臺者恃勢多所侵擾縣官不敢違
雄一切裁之以法勢少沮嘗曰任怨吾不辭但不至痛

吾百姓耳

王震字威遠邢臺人宏治十六年任應天府尹奏罷上元江寧花園夫千餘人省諸官寺獄具銀千餘兩覈江灘蘆葦千餘頃以佐赤縣里甲費尋上書乞骸骨歸

王嬭字存約黃巖人嘉靖初爲應天府尹應天賦徭繁重富人多投內監神帛堂以避而積累貧者嬭奏革織匠銅竹匠守庫薪夫等八百餘人裁齊庶人之供億節中使之浮餼籍記縣司丁錢使諸司不得恣取冗費爲之一清有京兆遺愛錄傳於金陵明史有傳

柴奇字德美崑山人正德辛未進士歷陞應天府尹清

查官占埋沒地還之民間以絕權勢起佃之謀積科試
羨餘開拓貢院規模爲之一新

孫懋字德夫浙江慈谿人正德辛未進士歷任應天府
尹值武宗南幸江彬等導上夜遊懋伏行宮請迴鑾疏
數十上指斥彬罪尤切人皆爲懋危不之恤也明史有
傳

劉自強河南人操持嚴峻人不敢干以私嘉靖中爲應
天府尹值歲旱自強撤蓋步禱涕泣告神甘雨如注民
賴更生

汪宗伊字子衡湖廣崇陽人隆慶初歷應天府尹宗伊

仁心爲質視民如傷而吏事精敏綜覈無遺條畫上江
二縣徭賦歲省萬餘金著爲額先是城居坊民本無土
田因里甲凋敝代供諸司破產相屬其後改爲僱役立
碑二縣歲徵二千金於庫官收吏支而諸司沓至縣不
能給復取之坊民溢額強半宗伊毅然裁減二縣歲徵
九百金責報循環并里甲賦役具疏上聞報可於是濫
差不及坊民以紓

方良曙字子賓歙人歷應天府尹釐剔井井甫及兩月
有希江陵旨者劾以老令致仕良曙聞之曰吾意也卽
日巾車返里中

徐申字維嶽吳縣人萬歷丁丑進士歷陞應天府尹值御府傳造龍旗帘屏諸供具費以鉅萬計賦額外無所措手申上疏極諫不得請乃增置錢局贏金六千有奇以抵諸費而民不擾上江兩邑坊廂久爲民厲申條奏革之歲省不經諸費六千餘金省科場供應千餘金增號舍三百而民不知役帑藏錢糧出入故稱難核申立指掌冊躬自會稽綱目井井隱冒挪移一切無所中嘗語人曰府藏故不絀吾一核之而上供數千金立辦在心計何如耳數延見鄉先達究問民所疾苦與利害興革所宜故能周知而復善應如此晉通政使請告歸

黃承元字與參浙江秀水人萬歷丙戌進士任應天府
尹嘉靖甲子請增科舉至三十餘人入學至二十餘人
又蜀府帑增號舍二百間使士無篷號輸號之苦往年
遇科場官之徵發民之將輸上下怔營幾無寧日承元
在事都城寂若無聲而事皆克辦他如嚴署篆之選革
加耗之弊禁保甲之害詰胥吏之姦通鼓鑄之利焚織
造之籍精考校之法拔幽滯之才爲尹僅踰年而德鬯
風行士民至今思之有生祠在貢院之左

姚思仁字羅浮浙江秀水人萬歷癸未進士爲應天府
尹剛毅清正風裁凜然治有罍黨害民思仁盡行訪捕

有立斃者有配遣者遍榜通衢遠邇稱快期望謁孔廟
後必與諸生立詢時務次及德行文藝諄諄訓誨藹若
父子膏火不繼者捐俸給之己未歲蝗蟲爲災無以納
糧思仁下令捕之每蝗若干準糧如數設法賑給貧民
全活甚衆民間有唐朝宰相明大京兆二姚媲美民生
再造之謠

徐必達字元仗浙江秀水人萬歷壬辰進士天啟初由
溧水縣令歷官順天府尹凡糴穀備賑平糶救荒清勘
合以蘇驛困革商稅以通貿易實心實政周悉詳明嘉
興錢相國謂其恩勤鬻閔孳孳窮簷而不爲裕臺府姦

剔蠹節浮凜凜操下而不爲屑瑟苛細真實錄也

談自省字季曾鎮江丹徒人萬歷甲辰進士爲應天府尹以去家密邇謝絕私交革弊釐姦興舉百務如甦銅商之困寬絲稅之征雪雲間諸生註誤之冤清姦胥積年侵欺之蠹商民共戴以首抗逆祠爲魏瑤所忌授意御史劉洪光劾之

劉之鳳字岐陽河南中牟人萬歷癸丑進士崇正初任應天府尹清廉謹慎日用淡薄與寒儒等交際餽遺悉行屏絕治百姓極寬而御下極嚴積胥見之無不股慄

明史有傳

劉餘祐字玉孺順天人萬歷丙辰進士崇正中應天府知府性豪爽不矜細節而藻鑑洞然所拔士皆名流留心民事勸課耕農值歲稔積穀救荒全活數萬人諸荒政皆餘祐經始而後人踵行增益之民受其賜歷官兵部尙書

王公亮直隸華亭人洪武初應天府治中草創之初民心未定剗剔煩苛壹意緩輯以卓異聞遷府丞益自淬勵舉所諳民情吏治斟酌施行人人大悅服公亮體貌魁梧舉止都雅居官廉重得大體有明京兆丞能拊民者公亮稱首

卷之三十三
寇天敘字子惇山西榆次人正德戊辰進士累遷應天府丞武宗駐南京從官衛士十餘萬日費金萬計近幸求索倍之府尹齊宗道憂懼卒天敘攝其事日青衣皂帽坐堂上江彬使者至好語之曰民窮官帑乏無可結歡丞專待譴耳其隨事禁制多類此駕駐九月南京不大困者天敘力居多明史有傳

楊瓌字仲玉松江華亭人嘉靖中爲應天府丞時府尹陳公錫屢疾在告瓌數署篆節財賦平物價都人稱便焉故事仇家多假手獄卒甘心繫囚瓌時巡獄中令凡囚有病非累藥不效勿狀全活甚衆江寧丞王震已陞

他縣貪酷事覺囑者秀午琛曰彼邑之民何罪焉竟坐以法

衛一鳳字伯瑞潞州人由進士萬歷中歷任應天府丞單車臨任所攜二三童僕自奉寒儉嘖笑不苟錢穀出入一覽洞然嘗小恙晝臥榻上見一女子爲煮藥一鳳詫而問之女子長跪泣訴曰妾前任張公婢也爲嫡所斃埋後園東牆下魄滯官舍魂不得往生以公正直神鬼所欽求移葬郊外庶游魂得歸耳言訖不見一鳳令人如言啟視果得其屍顏如生治棺改葬焉歷晉南大

司馬請告歸

李覺斯字曉湘廣東東莞人萬歷癸丑進士崇正初爲
應天府丞與大京兆詹士龍立公館於城東會諸鄉約
修明六諭進民間之秀而教之一時佻達之習頓改

徐石麒字寶摩嘉興人天啟壬戌進士崇正初歷任應
天府丞清理學校士風丕變時南都有絲商馬戶兩大
差徭率僉報大戶以充一經僉役家業立破石麒憫之
仿古僱役法令歲納銀若干以資貼備衆皆稱便江浦
通江大河約三十里年久淤塞春冬水涸商販往來必
從陸運所費加倍石麒僱夫挑濬直通大河行人利之
稱爲徐公河明史有傳

錢士貴字元冲松江人由進士崇正中爲應天府丞時
歲屢不登士貴勸諭積穀力行賑濟貧民得以更生有
不能納贖久繫獄中者士貴捐金代納俸入不能繼至
變里中產以足之囹圄幾空

張瑋字席之萬歷己未進士崇正庚辰任應天府丞時
南畿大旱公私交詘流冗萃處瑋悉心賑濟於城內外
立粥場活數十萬人辛巳又饑瑋踵行不倦時多棄小
兒於道瑋令民間收養餼以官粟經理荒政精悉無遺
仍以餘力與諸生講學課藝人文一振去任士民持香
香擁送者十餘里不絕明史有傳

金蘭字楚畹紹興人天啟己丑進士歷任應天府丞崇正辛巳壬午間旱疫並作蘭力行荒政與魏國徐宏基及部寺諸公捐俸捐資設廠開賑仍挪措金錢糴米江楚相續賑濟諸如慈幼局冬生房給藥施樁一切善政皆踵張公瑋之後而加詳焉

龐嵩字振卿南海人嘉靖甲辰由鄉舉授應天府通判晉治中先後凡八年大京兆缺屢攝其事初至歲大旱上官命督賑公粟竭貸之巨室富家全活者六萬七千餘人乃蠲積逋拊循勞來復業者又十萬六千餘人江寧縣葛仙永豐二鄉頻遭水患居民餘七戶嵩爲築堤

開萊得田三千六百畝立惠民莊召貧民佃之明史有傳

李棠字英拔福建平和人萬歷壬子擢判京兆轉治中於訟獄多所平反辨雪王廷珂陳德等冤獄民稱爲神明勘平高淳相國圩水利查還姦田冒占學田社學十六所歲久湮廢力復之丙辰夏蝗冬曠棠巡行捕禱歲事無告以勞瘁卒於官

趙其昌順天永平人崇正十六年爲應天府治中時江防廢弛其昌按汛稽察修墩臺製械器營伍一新流寇北犯南都震恐其昌以廉能受委修城隍詰姦宄地方

卷之三十三
三
賴之

林春字孟陽萬全衛人天順中以鄉貢授應天府馬政
通判清操自勵攻駒考牧恪盡乃心公平不苛民受其
惠每行縣較閱止食公廩一毫不取於民蒔蔬公廨以
自給其清廉如此

郎文煥字傲愚浙江烏程人由選貢歷任應天府判居
官廉正凡鞫批詞不輕罰贖緩以媚上官愛重學校拔
識英俊多歷登清要者

陳聯璧字珏庵湖廣應山人由廕授應天府通判辛巳
壬午歲大稔民飢相食時鄰境過糶大京兆以璧廉而

有才委任湖廣糴米設厰平價復爲蘆篷以居流民輕省刑罰減徭騶從鼓舞富戶輸粟相濟民賴全活者甚衆

余若楠河南人萬歷中授應天府推官加意學校生童月有課藝爲政剛柔互劑清正不私直指按臨詞訟浩煩若楠奉委鞫勘批決如流有余青天之稱陞戶部主事遮道泣送者千餘人

劉大川字邛浦北直易州人由舉人任應天府推官父斯澤官南大宗伯七子皆以門廕仕大川獨立志讀書登鄉薦居官愛民如子不事鞭朴好士下賢謝絕請託

同官敬而畏之

彭期生浙江海鹽人萬歷丙辰進士崇正初謫授應天府推官不攜家室廉從自隨而已遇事明了毫無停滯每聽訟必於法外行仁不妄入一罪不輕用一刑而人自凜凜不敢犯府缺尹期生攝篆遂正嘉以來先達李公應楨沈公越等十人入祀鄉賢以志景行明史附楊廷麟傳

國朝李正茂字生周順天人順治二年爲應天府尹改江寧府知府時百務草創一無成規正茂創設各署建修利涉上方石城等橋竭力經營不辭勞費革減重刑不

有輕定一死獄每存心施政必質之神明無敢以意爲喜怒在任數年抑豪惡禁羅織定賦則絕竿牘士民至今思之

林天擎字玉礎遼東人順治四年爲江寧府知府一意愛民雖軍興有午而於民無擾以舊國子監改創府學興起人文畫大中橋界使萬家安居六合冶山妖逆惑衆天擎立擒之凡滿漢有訟片言折之輒心服而去歲設分設粥廠活饑民二百餘萬

趙廷臣字君鄰遼東人順治初任江寧府江防同知仁厚明敏吏不敢欺江防實轄運務時漕撫沈公欲以黃

快船丁僉充運甲廷臣不可請於當事乞循舊冊運丁歸運黃快丁歸黃快船運衛無擾又優恤士子凡列名庠序者復其父兄弟槩不僉運兼攝江寧府篆精心查核見積弊有糧少而丁多者有糧多而丁少者有無糧而納丁者悉行釐正照糧輸丁當堂編審卽喚花戶至前填寫丁產實數給發印票胥吏無所肆其飛詭遠邇旄倪無不頌德云崇祀名宦

陳開虞字大亨陝西人康熙初知江寧府政尙簡肅三載請改修應天府志爲江寧府志延郡人鄧旭白夢麟夢簡纂撰成書公時時援證古今蒐采遺軼雖因實創

頗著苦心可謂循吏而兼好古者矣

于成龍字振甲奉天人康熙二十一年知江寧府時總督山西于成龍剛正於屬吏少許可獨獎成龍才興利除弊知無不爲是時徐州有姦民某走京師以左道惑衆上告事下制府檄江寧鎮江兩府會鞠成龍力白冤狀制府疑故縱詰責甚厲成龍持之愈力姦民卒坐誣瀕江蘆洲多爲豪強隱佔成龍以有課而無洲者爲坵江立予豁除有洲而無課者爲欺隱陞課而薄其罰人皆服其平後終河道總督卒諡襄勤崇祀名宦

施世綸字潯江鑲黃旗人原籍晉江爲靖海侯瓊之子

以廕生歷知江寧府豪右屏跡疑獄悉平終漕運總督
崇祀名宦

陳鵬年字北溟湖南湘潭人康熙間知江寧府政績卓
著歷任江南河督諡勤恪崇祀名宦

王光謨鑲黃旗人康熙間知江寧府著有善政崇祀名
宦

沈孟堅字賦亭湖州德清人雍正庚戌進士乾隆初歷
知江寧府事事上官以誠信接屬吏以慈和尤以正俗
安民爲急秦淮古名勝地郡人重夜泛晝船燈火連宵
達旦往往釀成事釁孟堅以風俗所關乃力禁夜泛俾

不廢游觀亦不沈酒又逐粉黛之流寓河房者淮水爲之一清先是溧水民劉芳請於江浦孟澤嘴開礦採煤縣令通詳上官已準行矣孟堅履任獨難之奏記兩府力陳不可者五以爲窯廠多設深山今孟澤嘴廬墓星羅不可一例載窯戶不許外方冒充唯同鄉休戚相關不致妄挖今劉芳外縣無賴顯與例背不可二煤路蛛絲馬蹟勢必震動墓宅不可三江南人情俱信風水一經開鑿便疑爲破傷地脈必至聚衆釀案不可四招徠礦徒半皆凶命雖設法鈐制流毒不淺不可五督撫以孟堅所見遠大遂廢議勒碑永禁浦民安之旋以小故

鑄級去士民攀畱泣送者不絕於路

丁易字學田

人康熙間任江防同知公餘之暇好

獎引士類不遺餘力凡績學敦行之士無不邀公真鑒
詩文必親自甲乙之如徐佩方舟黃越王天寅張煒劉
捷艾之駛輦皆以易爲指南稱門下士焉洵擢廣東副
使丁艱道出白門寓長干寺訪延舊士猶惓惓以道誼
相勗云

以上江寧府

新修江寧府志卷之二十六

名宦二

宋江秉之字元叔濟陽考城人宋少帝時以善政著名東土徵建康令爲治嚴祭京邑肅然南史有傳

顧憲之字士思吳郡吳人宋元徽中爲建康令時有盜牛者被主所認盜者亦稱己牛前後令莫能決憲之至覆其狀乃令解牛任其所之牛逕還主宅盜始伏辜發姦獲伏多如此類時人號曰神明南史有傳

陸徽字休猷吳郡人建康令清平無私南史載其孫杲傳內

齊劉元明臨淮人有吏能建康令政常爲天下第一傳
颺北地靈州人天監中爲建康令有能名嘗代元明爲
令問元明日願以舊政告新令尹答曰我有奇術知家
譜所不載臨別當相示既而曰作縣令惟日食一升飯
而莫飲酒此第一策也並附南史傅季珪傳

孫廉字思約東莞莒人建康令傅颺問曰聞丈人發姦
摘伏惠化如神何以致此荅曰無他也惟勤而清清則
憲綱自行勤則無事不理南史附傳

王沈字彥流東海人秣陵令清廉戒慎身恒居祿而居
處日貧死之日無宅可憇故吏爲營棺柩附南史傅季

珪傳

王摘東海人秣陵令清直請謁不行羽林隊主潘敞有寵二宮勢傾人主婦弟犯法敞爲之請摘投書于地更鞭四十敞怒譖之明日見代南史有傳

梁樂法才字元備滄陽人天監中爲建康令不受俸秩比去官俸已百金縣曹啟輸臺庫武帝嘉其清節曰居職若斯可以爲百城表矣南史有傳

褚球字仲寶陽翟人少孤貧篤志好學天監中建康令性公直無所屈撓吏民稱之梁書有傳

江革字休映考城人幼聰敏有才思建康正頻遷秣陵

建康令爲治明肅豪彊憚之南史有傳

劉沼魏昌人博學善屬文秣陵令有善政及卒民思之
不忘梁書有傳

孔奐字休文山陰人元帝時齊遣東方老蕭軌來寇四方
塞隔糧運不繼三軍取給唯在都下除奐建康令刻
日決戰奐乃令多營麥飯以荷葉裹之一宿之間得數
萬裹軍人宿飽遂大破敵南史有傳

陳司馬申字季和溫縣人大建九年除秣陵令在職以
清能見紀有白雀巢縣庭陳書有傳

蕭引字叔休蘭陵人後主卽位爲中庶子建康令宦官

李善度蔡脫兒等多所請屬引一切不許曰吾立身自有本末安能爲李蔡改行就令不平不過解職耳坐免官南史有傳

唐卜吉光啟中爲上元令安和不擾公餘之暇輒閉戶讀書而政事亦辦在職數年民懷思之

宋吳嗣復仁宗時知上元縣在任勤敏守廉百姓愛之明道初爲館閣校勘

李闢之紹興三十二年知上元開明疆敏才任有餘首言金陵鍾山慈仁三鄉實鄰大江田疇化爲水而乞除虛掛二稅從之宋史有傳

方楷景祐初知上元縣嘗親獲羣盜不干賞曰吾縣令
爲天子舉職耳功何有哉

趙時僑嘉定十五年知上元律己以嚴臨民以公不嚴
而威令行不擾而催科辦撫字之暇百廢皆飭

曹之格淳祐十二年知上元畱心政術豪猾斂迹昧且
卽起坐廳事校治簿書有訟者立與剖斷獄無繫囚境
內訟其平

鍾蜚英景定元年知上元創建學宇均民賦稅馬光祖
姚希得皆重之明年惟政鄉麥秀兩岐蜚英上其瑞理
宗勅獎之

元田賢知上元縣畱心民事夙夜弗怠庶務咸得其理
訟獄旣清暇俗以安敏惠廉明著於一時

明陳奩字聚奎慈谿人永樂中知上元奩被知遇自奮
勵朞月縣中大治有婦與外遇而殺其夫者將殯矣奩
於喪所擒婦詰問得實誅之人以爲神後改刑部主事
仁宗監國時素聞奩能及卽位奩入奏事迎謂曰此上
元陳知縣乎其受知若此

姜德政江山人景泰中知上元撫循惇獨勸課農桑諸
所不便於民者皆爲釐革有古良吏風

王定安大興人成化中知上元平易爲理人思之

馬良陝西人成化中爲上元丞量宏才敏節用愛人出於真誠事有難爲者必以身先之己之利害不計也擢本縣令

白思齊山西人正德時知上元縣始創縣志屬生員管景等成之

程燁字文純南城人嘉靖間知上元縣廉幹有治材時供億頗繁公私困弊燁加意節省損浮費十之五六屢決疑獄毀淫祠爲社學自縣治達句容塗中雨輒沒脛行者病焉燁以贖金修治之其善政爲諸邑最考滿之日囊止俸金七兩自騎一驢二蒼頭隨之糧長許翺等

持八十金候燻於大柳驛進之燻笑曰好良民恐父母
饑死耶持歸訓子孫讀書可也取其馬鞭鞭驢而去
袁鑑字廣昭廣東揭陽人嘉靖時由鄉貢授上元令居
官廉儉愛民如子日食惟蔬菜妻子衣服垢敝囊無餘
資賦役均平吏民皆愛之不忍欺

房韞玉字以輝山西靈石人嘉靖時任上元時坊廂積
弊年久而上官多取辦於中有司憚於更張民不堪命
韞玉不避譏嫌力申諸司爲之節省民得蘇息縣民建
惠澤祠祀之

林大黼字朝介福建莆田人萬曆元年授上元令爲人

聰明仁恕簿書積案一覽無餘吏胥卽大猾者亦莫能窺其意指臨事聽斷如神革去坊廂長改編丁銀省浮費什之七八民感其德立生祠祀之

賈應龍號螫菴河南祥符人上元令厚重慈祥有樂只之譽鄉民多有溺女者應龍責里保呈報防禁之又作歌句申勸之始多存活或以應龍之姓名其女以誌不忘

國朝郭士賢遼東人順治六年任上元令八年歲大稔流亾相繼糧額莫辦士賢申請將各院罰贖銀兩盡發糴米入倉不足則以已俸益之二年之中一水一旱皆用

此法民力不困而國儲亦不虧最爲良法

趙聯捷字雋公陝西咸寧人康熙時知上元縣濬河賑
荒民咸德之青龍山爲金陵來龍居氓多鑿石其間大
傷地脉公屢請上官力行禁止

唐開陶字晉公四川遂寧人知上元縣愛民下士招知
名士開館治城纂修縣志

宋葛邲字楚輔吳興人以廕授上元縣丞會金人犯江
境當敵衝調度百出邲不擾而辦畱守張浚王綸皆重
之宋史有傳

趙壘之建炎中爲上元縣丞金人過江諸將引去壘之

帥鄉兵迎敵死之贈奉議郎宋史有傳

程洙休寧人上元主簿撫字一本經術及代民遮畱不得發元兵入建康沐浴自經死

明袁龍合肥人成化中由監生任上元丞明道祠將廢龍捐俸修治在任久民愛之如父母稱曰袁撫民

劉元泰字孟達四川內江人萬歷間任上元縣丞潔已愛民才亦精敏攝縣事深知吏胥叢弊征斂正供外革去冗費清理軍伍裁冗書十六人民恐其他任競詣上官請畱之

宋程顥字伯淳河南人舉進士調上元主簿治多善政

茅山池有龍如蜥蜴而五色民俗嚴奉顯捕而脯之宋史有傳

漢蔣子文廣陵人嘗自謂己骨青死當爲神漢末爲秣陵尉逐盜至鍾山下被傷而死後人見子文於道侍從如平生以爲神而祀之代著靈異

明隋吉鄉貫不詳洪武中上元縣典史上言農民之中有一夫一婦受田百畝或四五十畝者當春夏耕種方殷或不幸夫病而婦給湯藥農務既廢田亦隨荒及病愈則時已過矣上無以供國賦下無以養室家窮困流離職此之由請命鄉里小民或二十家或四五十家團

爲一社每遇農急之時有疾病則一社協力助其耕耘
庶田不荒蕪民無饑窘百姓親睦而風俗厚矣上善其
言命戶部通行曉諭

以上上元

宋蘇頌字子容泉州南安人慶歷三年知江寧縣時建
業承李氏後稅賦圖籍無藝每發歛高下出吏手頌因
剗剔風蠹成賦一邑簡而易行諸令咸視以爲法宋史
有傳

葉義問字審言嚴州壽昌人紹興中知江寧縣召秦檜
所親役同官欲縱之義問曰釋是則何以服他人卒殺
之宋史有傳

張孝伯和州烏江人淳熙九年知江寧縣奏停年租額外徵辦始立養濟院累遷參知政事

劉垕閩之建安人寶慶三年知江寧縣事縣當制府之下應酬調遣爲令最難垕爲政愷悌慈祥不擾而事辦制閫以賢能薦於朝俾兼幕府

王鏜番陽人景定初知江寧縣舊無學鏜甫下車慨然以興學爲任適朝命置學官鏜曰有師無學非所以稱上旨卽建學於縣廨北又置田若干畝以備廩餼焉

元王蒙保定人大德間知江寧縣修築堤圩以政績聞秩滿遷建德路推官

吳德江寧縣達魯花赤有才幹每遇興作民不知勞遷
縣治於城南改縣尉司地

明張允昭洪武間知江寧縣上言江寧上元在輦轂之
下宜建學校以教京師子弟於是命置應天府學教授
一員訓導四員生員六十人應天有學自此始

張士彬山陽人洪武初以才行卓異薦知江寧縣有政
績擢監察御史以直聞

張安仁字仁夫九江人洪武初以人材授江寧縣知縣
清謹忠實時國家新造建設縣宇芻午不給安仁平明
坐廳事饗殮皆就公案百務具辦治爲時最

紀肅字宗魯山西人洪武中以薦舉知江寧縣存心仁恕民犯法者惟以善言曉譬嘗謂民曰令爲民父母未有父母不慈其子者恒恐不體予意不免以法相繩且失朝廷子養元元之意有部民負內府廚料不能償鬻妻以納官肅聞之愀然曰有司不能導民於善致使破家誰之咎也遂出妻孥簪珥令民贖妻還後肅卒於官民夫婦號哭如喪父母喪還民置主於私室奉祀之王愷字時舉蒲圻人靖難兵至應天求堪治劇者廷臣咸舉愷授江寧知縣勤敏果斷政績著聞

張德中字大本浙之新縣人永樂間以工部主事改知

江寧縣不事繩法一以愷悌寬仁爲本日理簿書斷獄訟兢兢然惟恐有誤每午夜而起思晝所爲民有犯罪當流者其母愬身老無他奉養乞畱以全餘生德中曰得罪發竄者法也畱養者情也古人申情於法中以長其仁不執法於情外以成其忍遂杖而遣之

李袞景泰中知江寧縣興利除害多所遺惠論賢令者推之

胡謚會稽人天順間知江寧縣廉明有威斷事至剖決如流邑中稱平以經術自任政事之暇諸生執經問業者日常數人

劉傳字師正成化十三年知江寧縣累決疑獄剖之如神

袁陽字健甫直隸滿城人宏治十一年以進士知江寧縣下車卽有政聲舊坊廂編役供應太繁陽深憐之爲白於府凡諸司取用必先赴府給票下縣方准應付若徑投縣者不得私與自是取者頓減民至今思之

朱宗字子因睢州人宏治初知江寧縣平易近民前丞富順胡溥夫婦同卒於官宗爲安厝立石題表

王誥字承恩保定人正德時知江寧縣武宗南駐徵需旁午吏民竄伏誥調停區畫不乏上供而民不困

崔尚義直隸長垣縣人由鄉貢嘉靖十二年任江寧令律已甚正吏畏民懷刻三事箴於門屏以自儆

何价字維藩湖廣衡州人嘉靖間知江寧縣時羔鴈漸侈人工事上而輕剝下价獨謝絕請託惟務節省民財挺然在風塵中

金傑浙江蘭溪人嘉靖間知江寧縣性恬澹持正治民不恃鞭朴迎送供億常以儉節而致色忤居官未半歲一夕因謁上官歸中途授印於吏遂去不知所之後人傳其隱九華山云

雷學尹字尚志湖廣隨州人萬歷十一年任江寧令軫

念民瘼勤督庶務嘗曰有司一不屑於猥瑣卽狐鼠得肆毒噬估修馴象等四門暨修理板橋公館諸大小公廨皆躬自步算嚴覈課程費無冒破而工就實用時水田澇壞民苦荒饑爲設修圩款目事均而易集陞南戶部主事

祝朝用四川人嘉靖中知江寧縣撫卹黎庶搜剔弊竇吏胥之狡者無所騁民咸感之

劉必達號柱石陝西三原人知江寧縣風裁凌厲不畏強禦善決斷故案無畱牘尤加意學校賑貧扶懦輕徭役豁贖錢足稱古之遺愛云

田有年號心海陝西人任江寧令居官清絕一塵氣岸骨立故事初謁守備太監用廷叅禮有年獨長揖監無如之何揚州獲一狂僧攀誣庠生余中鰲魏國族人徐維禮等私蓄兵器謀爲不軌大司馬錯愕命有年搜究年躬往查核都無所有據實詳報皆得免

郭廷輅字時制文水縣人嘉靖中爲江寧丞職司清軍前任多以候審廢民業甚或恣吏胥爲姦廷輅律已旣約御民以靖款款有法清而不擾時又審編戶籍派均而人服佐令稱賢

黃光涵皖之太湖人嘉靖中爲江寧丞嘗攝簿事簿故

職儲有例金每里甲之長歲代編戶輸漕因以例金領簿從中腹削不可勝言光涵惡其厲民也獨正色不受轉聞上官勒石著爲令

元梅鼎大德五年江寧縣主簿時縣境值江湖泛漲歲凶民無賴鼎設法賑濟民不流移在任開治塗巷修葺公宇若營家室不惜勞瘁常俸之外毫無所取尤善理刑人畏而敬之蒞政三年以賢績著聞選充江南行臺令史

陳益字汝謙太平縣人至順中任江寧主簿在任以清謹稱時民饑疫死者枕籍益出郭見遺骸惻然爲之掩

瘞焉

明馬應祥字伯圖陝西榆林衛人嘉靖中江寧縣主簿
追徵糧差不問餘羨謝絕糧里常例不取兌運軍儲或
爲軍官折剗旗甲欺侮曰吾爲百姓無怨言無何卒官
邑人哀之

國朝侯嘉縉字夷門浙江天台人乾隆中江寧縣丞清廉
有聲

馮光煦浙江人乾隆甲寅乙卯間任江寧縣縣丞丞署
向設南門外凡鄉民有訟者咸就光煦剖曲直光煦
以理反覆諭之兩造莫不感服去嘗署其廨曰有一日

閉且耕爾地無十分屈勿入我門鄉民化之訟者自息
值歲災奉上官檄辦賑歲役無絲毫私田夫野老至今
猶能誦馮縣丞爲好官也

以上
江寧

晉劉超字世瑜臨沂人元帝時句容令推誠於物百姓
懷之常年賦稅主者常四出詰評百姓家貲超但作大
函使各自書家產投函中依實投課所入有踰常年晉
書有傳崇祀名宦

宋孫謙字長遜東莞莒人宋時爲句容令清慎疆記縣
人號曰神明南史有傳崇祀名宦

陳周羅暎字公布九江潯陽人句容令南史有傳崇祀

名宦

唐岑植鄧州人文本孫也爲句容令明達善斷民之情
僞纖毫必察唐書有傳

楊延嘉麟德中句容令因梁故堤置絳巖湖以溉田
王昕大歷中句容令復置絳巖湖周百里爲塘立二斗
門以節旱暵開田萬頃

宋龔宗元吳人天聖間進士知句容縣發姦摘伏政稱
神明部使者不入其境

邱濬字道源黟縣人天聖中登進士第因讀易悟損益
二卦之義遂通數學知未來興廢早歲遊華陽洞景祐

間求爲句容令秩滿以詩寄茅山道友曰鳴鳳相邀覽
德輝松蘿從此與心違孤峰萬仞月正照古屋數間人
未歸欲訪唐虞開有道深慚茅許勸忘機明朝又引輕
帆去紫朮年年空自肥歷官殿中丞今崇祀

方竣慶歷時句容令廉慎有爲愛民興學重修孔廟自
爲文記之

葉表元豐間句容令整飭風俗崇尚德化以學舍污漏
度縣南廢驛遷造至今儒學皆賴之自爲文以記

王代恕河南通許人句容令卒贈尚書兵部員外郎墓
在縣之栢子岡歐陽修銘

龔濤字仲山東平人紹興壬申爲句容令履行端方飾吏治以儒術修舉廢墜首先學校士風丕振

趙時侃金壇人慶元四年爲句容令初縣增科和買大爲民害侃請郡守吳瑀府帑歲出萬三千緡爲之代輸又修學宮取沒官田以養士邑人祀之學宮

張侁邗城人寶慶二年爲句容令勤政愛民百廢俱舉紹定元年開放生池築亭作記是年有五瑞芝產於縣境崇祀名宦

吳琪括蒼人紹定間爲句容令公平正大有守有爲當軍事方殷供應絡繹琪撫綏下民使安田里振興學校

恢復舊制入境有弦歌之化

張桀南徐人淳祐間句容令修德行政敦儒重教製祭服定禮儀歲將大比設文會嚴課應試生徒多所造就邑民感化

王子吳字彥齋潼州人咸淳間爲句容令持身清正蒞政公平民皆頌德構堂三間於廳後顏曰清明

葛秉德祐元年知句容縣事元伯顏陷建康招諭句容秉兵敗自繫獄死之

元趙靖至大中爲句容縣尹首建學校縣額歲辦紅花若干願非土所有民頗苦之靖爲請於上官獲免有謝

潤者尹是縣亦以政績著聞

程恭泰定二年尹句容以撫字爲政諸所不便於民者
亟除去治後有廢址植桑萬株民趨效之有古良吏風
李溥字叔敬彰德人臨民簡重興賢育材張承務字士
貴邯鄲人撫綏黎庶篤義儒林至正間皆爲句容令
明王成字國用湖廣蘄春人洪武初爲句容令存心公
恕爲事果毅邑人以廉幹稱之崇祀名宦

劉義諸城人明察曉吏事景泰間丞句容以政績優異
進知縣凡民間姦滑豪斷皆知其主名有犯卽捕治之
里中肅然又俗以奢侈相高尚婚喪多踰制者乃嚴爲

約禁人多化之崇祀名宦

韓鼎浙江定海人句容縣令存心正大行政簡要吏民多所畏服卒於官崇祀名宦

徐廣曹州人成化間知句容縣抑強扶弱作養士類有聲畿輔間崇祀名宦

韓繼字思孝河間人句容令居官廉明不事苛察民多德之

朱彤字彥功湖廣蘄州人句容令秉持公直政尚寬平學校壇境多所修理

盧信字信忠浙江臨海人句容縣丞愷悌仁恕苛刻不

行累官刑部郎中

徐大安永樂時知句容縣廉守有爲凡有廢墜竭力修舉民皆慕之

周庸節江西人永樂十五年知句容縣持身廉謹臨民公恕振興士類屏除姦邪

張蕙忻州人句容令矜嚴自持吏民畏服擢監察御史賈楨陝西人成化年句容縣主簿平易愛民亢旱徒跣茅山禱雨罹暑毒卒士民感愴形諸詠歌

王僖浙江人宏治初句容令興賢育才積穀備荒紀資直隸任邱人知句容縣剛直廉介比包孝肅有祠

曰遺愛

魯應華浙江人句容令約己愛民民祠祀之名曰廉惠
周美浙江人句容令造魚鱗冊清釐民累民祠祀之
李文熙南宮人句容縣知縣清介嚴肅力除吏弊人不
敢以私謁秩滿去蕭然一寒士也擢監察御史百姓思
之

李澄字天映西華人由進士爲句容令心存仁恕政尙
清勤嘗遍書訓詞勸民爲善捐俸市藥以濟貧病買地
立阡以葬窮民崇祀名宦

樊垣字伯師四川宜賓人由嘉靖癸丑進士授句容令

英年長材剽繁理劇綽有餘裕時值倭夷煽亂三吳橫
遭焚溺垣懼容無城難守乃請諸當道設法創造瀕完
倭五十六人由容邊界走小丹陽直犯京師垣率衆登
陴晝夜捍禦卒免蹂踐之禍崇祀名宦

徐九思字子慎貴溪人嘉靖中知句容縣嘗圖一菜于
壁上曰爲吾赤子不可令有此色爲民父母不可不知
此味始視事恂恂若不能俄有吏袖空牒竊印者九思
摘其姦論如法於是人人懍恐明史有傳崇祀名宦

丁賓字廷禮號改亭嘉善人隆慶辛未進士爲句容令
首建義倉行鄉約清田賦減繇役豁羨萬餘歲省民供

本折各七千七百有奇治七年以卓異入爲御史明史
有傳崇祀名宦

陳於王浙江嘉善人仁聲善政傳播四境崇祀名宦

唐楊於陵字達夫陝西人漢太尉震之裔孫也擢進士
調句容主簿器局峻整節操堅明未嘗從人俛仰崇祀
名宦

宋胡崇徽州黟縣人淳熙四年進士授句容主簿制置
使吳潛辟爲閩幕委行經界法於溧陽不履畝而人無
所欺

張佖建隆二年爲句容縣尉上書陳十事其略曰一舉

簡大以行君道二略繁小以責臣職三明賞罰以彰勸
懲四慎名器以杜威權五詢言行以責忠良六均賦役
以安黎庶七納諫諍以容正直八究毀譽以遠讒佞九
節用以行恭儉十克己以固舊好尤在審先代之治亂
考前載之褒貶纖芥之惡必去毫釐之善必爲密取與
之機濟寬猛之政進經學之士退培克之吏察邇言以
廣視聽好下問以開閉塞斥無用之物罷不急之務此
而不治臣不言矣帝嘉納之擢監察御史

明梁駿通州武清人成化間任句容典史秉性剛直持
身廉介崇祀名宦

國朝馬瑾字公瑜山西長子人順治三年進士句容縣令
惠心清德恩澤四周莅任一載與民休息相關卒於官
邑民恒隕涕崇祀名宦

耿起鳳旗人康熙間句容縣丞赤心愛民民肖其像於
姜公祠後

周應宿字念山浙之山陰人乾隆二年以庶吉士出知
句容縣甫下車卽值旱暵平價籌賑親履窮簷分別老
弱孤獨度村墟遠近多設粥廠全活者九萬餘口

宋楚望字恒齋湖北當陽人乾隆五年由進士選授句
容縣令庚申大旱屢禱不雨一日移城隍像於郊外與

神露處士民伏請歸署不允邑士某慮公饑夜半以茶
點進公適公以命案馳驗他往因跪獻茶器於神前倏
聞神長歎一聲不覺悚懼由是知公之誠能格於神而
神力亦窮於天故有此歎也不數日大雨如注

以上
句容